

ओं नमः परमात्मने, श्री महागणपतये नमः,

श्री गुरुभ्यो नमः, हरिः ओं

कृष्ण यजुर्वेदीय तैत्तिरीय संहिता

पद पाठः (वाक्य सहित)

तृतीयकाण्डे तृतीयः प्रश्नः

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site [www.vedavms.in](http://www.vedavms.in)

---

## **Version Notes:**

**This is now the current Version 2.0 dated June 30, 2024.**

1. This replaces the earlier version 1.1 dated Sep 30, 2022.
2. This version has been updated with the errors found and reported till June 15, 2024.
3. Required convention, style and presentation improvements or standardisations has been done wherever applicable.
4. In this Compilation the Samita Vaakyams have been suitably aligned, synchronised and refurbished in line with "Pada Paatam".

## **Earlier Versions**

1st	Version Number	0.0 dated 31st January 2019
2nd	Version Number	0.0 dated 31st July 2019
3rd	Version Number	1.0 dated 30th Nov 2020
4th	Version Number	1.1 dated 30th Sep 2022

---

Table of Contents

3 कृष्ण यजुर्वेदीय तैत्तिरीय संहितायं पद पाठे तृतीयं  
काण्डं..... 4

3.3 तृतीयकाण्डे तृतीयः प्रश्नः – वैकृतविधीनामभिधानं..... 4

पद पाठे (वाक्य सहित) – तृतीयकाण्डे – तृतीयः प्रश्नः

ओं नमः परमात्मने, श्री महागणपतये नमः, श्री गुरुभ्यो नमः

हरिः ओं

### 3 कृष्ण यजुर्वेदीय तैत्तिरीय संहितायं

#### पद पाठे तृतीयं काण्डं

#### 3.3 तृतीयकाण्डे तृतीयः प्रश्नः – वैकृतविधीनामभिधानं

##### TS 3.3.1.1

अग्ने॑ तेज॒स्विन् तेज॒स्वी त्वं दे॒वेषु॑ भूया॒स्तेज॒स्वन्तं॒ मा-मायु॑ष्मन्तं॒  
वर्च॑स्वन्तं मनु॒ष्येषु॑ कुरु दी॒क्षायै॑ च त्वा तप॑सश्च तेज॒से जुहोमि॑  
तेजो॑विदसि तेजो॑ मा मा हासी॒न्माऽहं तेजो॑ हासिषं॒ मा मां तेजो॑  
हासी॒दिन्द्रो॑जस्विन्नो॒जस्वी त्वं दे॒वेषु॑ भूया॒ ओज॑स्वन्तं॒ मामायु॑ष्मन्तं॒  
वर्च॑स्वन्तं मनु॒ष्येषु॑ कुरु ब्रह्म॑णश्च त्वा क्ष॒त्रस्य॑ चो – [ ] 1

##### TS 3.3.1.1- Padam

अग्ने॑ । तेज॒स्विन् । तेज॒स्वी । त्वम् । दे॒वेषु॑ । भूयाः॑ । तेज॒स्वन्तम् ।  
माम् । आयु॑ष्मन्तम् । वर्च॑स्वन्तम् । मनु॒ष्येषु॑ । कुरु॑ । दी॒क्षायै॑ । च ।  
त्वा । तप॑सः । च । तेज॒से । जुहोमि॑ । तेजो॑विदिति तेजः – वित् ।

अ॒सि॒ । ते॒जः॑ । मा॒ । मा॒ । हा॒सी॒त् । मा॒ । अ॒हम् । ते॒जः॑ ।  
हा॒सि॒षम् । मा॒ । मा॒म् । ते॒जः॑ । हा॒सी॒त् । इ॒न्द्र । ओ॒ज॒स्वि॒न् ।  
ओ॒ज॒स्वी॑ । त्वम् । दे॒वेषु॑ । भू॒याः । ओ॒ज॒स्वन्त॑म् । मा॒म् ।  
आ॒यु॒ष्मन्त॑म् । वर्च॑स्वन्तम् । म॒नु॒ष्येषु॑ । कु॒रु । ब्र॒ह्म॒णः । च॒ ।  
त्वा॒ । क्ष॒त्र॒स्य॑ । च॒ । 1 (50)

**TS 3.3.1.2**

-ज॒से जु॒हो॒म्यो॒जो॒वि॒द॒स्यो॒जो॒ मा॒ मा॒ हा॒सी॒न्मा॒ऽह॒मो॒जो॒ हा॒सि॒षं मा॒  
मा॒मो॒जो॒ हा॒सी॒त् सूर्य॑ भ्रा॒ज॒स्वि॒न् भ्रा॒ज॒स्वी॑ त्वं दे॒वेषु॑ भू॒या  
भ्रा॒ज॒स्वन्तं॑ मा॒मा॒यु॒ष्मन्तं॑ वर्च॑स्वन्तं म॒नु॒ष्येषु॑ कु॒रु वा॒योश्च॑ त्वा॒ऽपा॒ञ्च  
भ्रा॒ज॒से जु॒हो॒मि॒सु॒र्वि॒द॒सि॒ सु॒वर्मा॑ मा॒ हा॒सी॒न्मा॒ऽह॒ सु॒वर्. हा॒सि॒षं  
मा॒ मा॒ऽ सु॒वर्. हा॒सी॒न् म॒यि ( ) मे॒धां म॒यि प्र॒जां म॒य्य॒ग्नि॒स्ते॒जो  
द॒धातु॑ म॒यि मे॒धां म॒यि प्र॒जां म॒यीन्द्र॑ इ॒न्द्रि॒यं द॒धातु॑ म॒यि मे॒धां म॒यि  
प्र॒जां म॒यि सूर्यो॑ भ्रा॒जो॑ द॒धातु॑ ॥ 2

**TS 3.3.1.2 - Padam**

ओ॒ज॒से॑ । जु॒हो॒मि॑ । ओ॒जो॒वि॒दि॒त्यो॒जः॑ – वि॒त् । अ॒सि॒ । ओ॒जः॑ ।  
मा॒ । मा॒ । हा॒सी॒त् । मा॒ । अ॒ह॒म् । ओ॒जः॑ । हा॒सि॒ष॒म् । मा॒ । मा॒म् ।  
ओ॒जः॑ । हा॒सी॒त् । सू॒र्य॑ । भ्रा॒ज॒स्वि॒न् । भ्रा॒ज॒स्वी॑ । त्व॒म् । दे॒वेषु॑ ।  
भू॒याः॑ । भ्रा॒ज॒स्व॒न्त॒म् । मा॒म् । आ॒यु॒ष्म॒न्त॒म् । वर्च॑स्व॒न्त॒म् ।  
म॒नु॒ष्येषु॑ । कु॒रु॒ । वा॒योः॑ । च॒ । त्वा॒ । अ॒पाम् । च॒ । भ्रा॒ज॒से॑ ।  
जु॒हो॒मि॑ । सु॒व॒र्वि॒दि॒ति॑ सु॒वः॑ – वि॒त् । अ॒सि॒ । सु॒वः॑ । मा॒ । मा॒ ।  
हा॒सी॒त् । मा॒ । अ॒ह॒म् । सु॒वः॑ । हा॒सि॒ष॒म् । मा॒ । मा॒म् । सु॒वः॑ ।  
हा॒सी॒त् । म॒यि॑ ( ) । मे॒धाम् । म॒यि॑ । प्र॒जा॒मि॒ति॑ प्र – जा॒म् । म॒यि॑ ।  
अ॒ग्निः॑ । ते॒जः॑ । द॒धा॒तु॑ । म॒यि॑ । मे॒धाम् । म॒यि॑ । प्र॒जा॒मि॒ति॑  
प्र – जा॒म् । म॒यि॑ । इ॒न्द्रः॑ । इ॒न्द्रि॒य॒म् । द॒धा॒तु॑ । म॒यि॑ । मे॒धाम् ।  
म॒यि॑ । प्र॒जा॒मि॒ति॑ प्र – जा॒म् । म॒यि॑ । सू॒र्यः॑ । भ्रा॒जः॑ ।

द॒धा॒तु॑ ॥ 2 (73)

(क्ष॒त्र॒स्य॑ च – म॒यि – त्रयो॑वि॒ंश॒तिश्च) (A1)

**TS 3.3.2.1**

वा॒युर् हिं॑कर्ता॒ ऽग्निः प्र॑स्तो॒ता प्र॒जाप॑तिः॒ साम॒ बृ॒हस्प॑तिरुद्गा॒ता  
विश्वे॑ दे॒वा उप॑गा॒तारो॑ मरु॒तः प्र॑ति॒हर्तार॑ इन्द्रो॒ निध॑नन्ते दे॒वाः  
प्राण॑भृतः प्राणं॒ मयि॑ दध॒त्वेतद्-वै॑ सर्व॑म॒ध्वर्यु॑-रुपाकु॒र्वन्नुद्गा॑तृ॒भ्य  
उपा॑करोति॒ ते दे॒वाः प्राण॑भृतः प्राणं॒ मयि॑ दध॒त्वित्या॑है॒तदे॒व  
सर्व॑मा॒त्मन् ध॑त्त॒ इडा॑ दे॒वहूर् म॑नुर् य॒ज्ञनी॑र् बृ॒हस्प॑तिरुक्थाम॒दानि॑  
श॒सिष॑द् विश्वे॑ दे॒वाः - [ ] 3

**TS 3.3.2.1 - Padam**

वा॒युः । हिं॑कर्तेति॒ हिं - क॒र्ता । अ॒ग्निः । प्र॑स्तोतेति॒ प्र - स्तो॒ता ।  
प्र॒जाप॑तिरिति॒ प्र॒जा - प॒तिः । साम॑ । बृ॒हस्प॑तिः ।  
उद्गा॑तेत्युत् - गा॒ता । विश्वे॑ । दे॒वाः । उप॑गा॒तार इत्यु॑प - गा॒तारः ।  
मरु॒तः । प्र॑ति॒हर्तार॑ इति॒ प्रति - ह॒र्तारः । इन्द्रः॑ । नि॒ध॒नमि॑ति  
नि - ध॑नम् । ते । दे॒वाः । प्राण॑भृत इति॒ प्राण - भृ॑तः । प्राण॑मिति॒  
प्र - अ॒नम् । मयि॑ । दध॒तु । ए॒तत् । वै । सर्व॑म् । अ॒ध्व॒र्युः ।  
उपा॑कु॒र्वन्नित्यु॑प - आ॒कु॒र्वन् । उद्गा॑तृ॒भ्य इत्युद्गा॑तृ - भ्यः ।  
उपा॑करोतीत्यु॑प - आ॒करो॑ति । ते । दे॒वाः ।

प्राणभृ॒त इति॑ प्राण॒ – भृ॒तः । प्राणमि॑ति प्र-अ॒नम् । मयि॑ । द॒धतु॑ ।  
इति॑ । आ॒ह । ए॒तत् । ए॒व । सर्व॑म् । आ॒त्मन् । ध॒त्ते । इडा॑ ॥  
दे॒वहू॑रिति॑ दे॒व – हूः । म॒नुः । य॒ज्ञनी॑रिति॑ य॒ज्ञ – नीः । बृ॒हस्प॑तिः ।  
उ॒क्थाम॑दानीत्यु॒क्थ – म॒दानि॑ । श॒सि॑षत् । वि॒श्वे ॥ दे॒वाः । 3 (50)

**TS 3.3.2.2**

सू॒क्तवा॑चः पृथि॑वि मा॒तर्मा॑ मा॒ हि॒सी॑र् मधु॑ म॒निष्ये॑ मधु॑ ज॒निष्ये॑  
मधु॑व॒क्ष्यामि॑ मधु॑व॒दिष्यामि॑ मधु॑म॒तीं दे॒वेभ्यो॑ वा॒चमु॒द्यास॑  
शुश्रू॑षे॒ण्यां म॒नुष्ये॑भ्य॒स्तं मा॑ दे॒वा अ॒वन्तु॑ शो॒भायै॑ पि॒तरोऽनु॑

मदन्तु ॥ 4

**TS 3.3.2.2 - Padam**

सू॒क्तवा॑च इति॑ सू॒क्त – वा॒चः । पृथि॑वि । मा॒तः । मा॒ । मा॒ ।  
हि॒सीः । मधु॑ । म॒निष्ये॑ । मधु॑ । ज॒निष्ये॑ । मधु॑ । व॒क्ष्यामि॑ ।  
मधु॑ । व॒दिष्यामि॑ । मधु॑म॒तीमि॑ति॒ मधु॑ – म॒तीम् । दे॒वेभ्यः॑ । वा॒चम् ॥  
उ॒द्यास॑म् । शुश्रू॑षे॒ण्याम् । म॒नुष्ये॑भ्यः॑ । तम् । मा॒ । दे॒वाः । अ॒वन्तु॑ ।  
शो॒भायै॑ । पि॒तरः॑ । अ॒न्विति॑ । म॒दन्तु॑ ॥ 4 (28)

(श॒सि॑षद् वि॒श्वे दे॒वा – अ॒ष्टावि॑शतिश्च) (A2)



**TS 3.3.3.1**

वसवस्त्वा प्र वृहन्तु गायत्रेण छन्दसा अग्नेः प्रियं पाथ उपेहि  
रुद्रास्त्वा प्र वृहन्तु त्रैष्टुभेन छन्दसेन्द्रस्य प्रियं पाथ उपेह्यादित्यास्त्वा  
प्र वृहन्तु जागतेन छन्दसा विश्वेषां देवानां प्रियं पाथ उपेहि मान्दासु  
ते शुक्र शुक्रमा धूनोमि भन्दनासु कोतनासु नूतनासु रेशीषु मेषीषु  
वाशीषु विश्वभृथ्सु माद्ध्वीषु ककुहासु शक्वरीषु – [ ] 5

**TS 3.3.3.1 - Padam**

वसवः । त्वा । प्रेति । वृहन्तु । गायत्रेण । छन्दसा । अग्नेः ।  
प्रियम् । पाथः । उपेति । इहि । रुद्राः । त्वा । प्रेति । वृहन्तु ।  
त्रैष्टुभेन । छन्दसा । इन्द्रस्य । प्रियम् । पाथः । उपेति । इहि ।  
आदित्याः । त्वा । प्रेति । वृहन्तु । जागतेन । छन्दसा । विश्वेषाम् ।  
देवानाम् । प्रियम् । पाथः । उपेति । इहि । मान्दासु । ते । शुक्र ।  
शुक्रम् । एति । धूनोमि । भन्दनासु । कोतनासु । नूतनासु ।  
रेशीषु । मेषीषु । वाशीषु । विश्वभृथिस्विति विश्वभृत् – सु ।  
माद्ध्वीषु । ककुहासु । शक्वरीषु । 5 (50)

**TS 3.3.3.2**

शुक्रासु॑ ते शुक्र॑ शुक्र॑मा धू॒नोमि॑ शु॒क्रं ते शु॒क्रेण॑ गृ॒ह्णाम्य॑हो॒ रूपेण॑  
सूर्य॑स्य रश्मि॑भिः ॥

आ॒ऽस्मिन्नु॒ग्रा अ॑चु॒च्यवु॑र्दिवो॒ धारा॑ असश्चत ॥

क॒कु॒ह॒ꣳ रूपं॑ वृ॒षभ॑स्य रोचते बृ॒हत् सोमः॑ सोम॑स्य पु॒रोगाः॑ शु॒क्रः  
शु॒क्रस्य॑ पु॒रोगाः॑ ॥

यत् ते॑ सो॒मादा॑भ्यं॒ नाम॒ जागृ॑वि॒ तस्मै॑ ते सोम॑ सोमा॒य स्वा॑हो॒शिक्  
त्वं दे॒व सोम॑ गाय॒त्रेण॑ छन्द॒सा ऽग्नेः॑ – [ ] 6

**TS 3.3.3.2 - Padam**

शु॒क्रासु॑ । ते । शु॒क्र । शु॒क्रम् । एति॑ । धू॒नोमि॑ । शु॒क्रम् । ते ।  
शु॒क्रेण॑ । गृ॒ह्णामि॑ । अ॒हः । रूपेण॑ । सूर्य॑स्य । रश्मि॑भिरिति॑  
रश्मि॑-भिः ॥ एति॑ । अ॒स्मिन्नु॒ग्राः । अ॒चु॒च्यवुः॑ । दि॒वः । धाराः॑ ।  
असश्चत॑ ॥ क॒कु॒ह॒म् । रूपम् । वृ॒षभ॑स्य । रोचते॑ । बृ॒हत् । सोमः॑ ।  
सोम॑स्य । पु॒रोगा॑ इति॑ पुरः – गाः । शु॒क्रः । शु॒क्रस्य॑ । पु॒रोगा॑ इति॑  
पुरः – गाः ॥ यत् । ते । सोम॑ । अदा॑भ्यम् । नाम॑ । जागृ॑वि ।

त॒स्मै॑ । ते॒ । सो॒म॒ । सो॒माय॑ । स्वाहा॑ । उ॒शिक् । त्वम् । दे॒व॒ ।

सो॒म॒ । गा॒य॒त्रेण॑ । छ॒न्द॒सा॒ । अ॒ग्नेः॑ । 6 (50)

**TS 3.3.3.3**

प्रि॒यं पा॒थो॑ अ॒पी॒हि॒ व॒शी॑ त्वं दे॒व सो॒म त्रै॒ष्टु॒भेन॑ छ॒न्द॒सेन्द्र॑स्य प्रि॒यं  
पा॒थो॑ अ॒पी॒ह्य॒स्मथ्स॒खा॒ त्वं दे॒व सो॒म जा॒ग॒तेन॑ छ॒न्द॒सा॒ वि॒श्वे॑षां दे॒वानां॑  
प्रि॒यं पा॒थो॑ अ॒पी॒ह्या॒ नः॑ प्रा॒ण ए॒तु॒ परा॒व॒त आ॑ ऽन्त॒रि॒क्षा॒द्वि॒व॒स्परि॑ ।  
आ॒युः॑ पृथि॒व्या॒ अ॒ध्य॒मृ॒त॒म॒सि॑ प्रा॒णाय॑ त्वा ॥

इ॒न्द्रा॒ग्नी॒ मे॒ वर्चः॑ कृ॒णु॒तां॑ वर्चः॑ सो॒मो॒ बृ॒ह॒स्पतिः॑ ( ) ।

वर्चो॑ मे॒ वि॒श्वे॑ दे॒वा॒ वर्चो॑ मे॒ ध॒त्त॒म॒श्चि॒ना ॥

द॒ध॒न्वे॒ वा॒ यदी॒म॒नु॒ वो॒च॒द् ब्र॒ह्मा॒णि॒ वे॒रु॒ तत् ।

परि॑ वि॒श्वानि॑ का॒व्या॒ ने॒मि॒श्च॒क्र॒-मि॒वा॒भवत् ॥ 7

**TS 3.3.3.3 - Padam**

प्रि॒यम् । पा॒थः॑ । अ॒पी॒ति॑ । इ॒हि॒ । व॒शी॑ । त्वम् । दे॒व॒ । सो॒म॒ ।

त्रै॒ष्टु॒भेन॑ । छ॒न्द॒सा॒ । इ॒न्द्र॑स्य । प्रि॒यम् । पा॒थः॑ । अ॒पी॒ति॑ । इ॒हि॒ ।

अ॒स्मथ्स॒खे॒त्य॒स्मत् - स॒खा॒ । त्वम् । दे॒व॒ । सो॒म॒ । जा॒ग॒तेन॑ ।

पद पाठे (वाक्य सहित) – तृतीयकाण्डे – तृतीयः प्रश्नः

छन्दसा । विश्वेषाम् । देवानाम् । प्रियम् । पाथः । अपीति । इहि ।  
 एति । नः । प्राण इति प्र – अनः । एतु । परावत इति परा-वतः ।  
 एति । अन्तरिक्षात् । दिवः । परि ॥ आयुः । पृथिव्याः । अधीति ।  
 अमृतम् । असि । प्राणायेति प्र – अनाय । त्वा ॥ इन्द्राग्नी  
 इतीन्द्र-अग्नी । मे । वर्चः । कृणुताम् । वर्चः । सोमः ।  
 बृहस्पतिः ( ) ॥ वर्चः । मे । विश्वे । देवाः । वर्चः । मे । धत्तम् ।  
 अश्विना ॥ दधन्वे । वा । यत् । ईम् । अन्विति । वोचत् । ब्रह्माणि ।  
 वेः । उ । तत् ॥ परीति । विश्वानि । काव्या ॥ नेमिः । चक्रम् । इव ।

अभवत् ॥ 7 (75)

(शक्वरीष्व - ग्नेर् - बृहस्पतिः - पञ्चविंशतिश्च) (A3)

**TS 3.3.4.1**

एतद्-वा अपां नामधेयं गुह्यं यदाधावा मान्दासु ते शुक्र शुक्रमा  
 धूनोमीत्याहापामेव नामधेयेन गुह्येन दिवो वृष्टिमव रुन्धे शुक्रं ते  
 शुक्रेण गृह्णामीत्याहैतद्-वा अहो रूपं यद्-रात्रिः सूर्यस्य रश्मयो

वृष्ट्या ईशतेऽह एव रूपेण सूर्यस्य रश्मिभिर्दिवो वृष्टिं

च्यावयत्याऽस्मिन्नुग्रा – [ ] 8

**TS 3.3.4.1 - Padam**

एतत् । वै । अपाम् । नामधेयमिति नाम – धेयम् । गुह्यम् । यत् ।  
 आधावा इत्या – धावाः । मान्दासु । ते । शुक्र । शुक्रम् । एति ।  
 धूनोमि । इति । आह । अपाम् । एव । नामधेयेनेति नाम – धेयेन ।  
 गुह्येन । दिवः । वृष्टिम् । अवेति । रुन्धे । शुक्रम् । ते । शुक्रेण ।  
 गृह्णामि । इति । आह । एतत् । वै । अहः । रूपम् । यत् । रात्रिः ।  
 सूर्यस्य । रश्मयः । वृष्ट्याः । ईशते । अहः । एव । रूपेण ।  
 सूर्यस्य । रश्मिभिरिति रश्मि – भिः । दिवः । वृष्टिम् । च्यावयति ।  
 एति । अस्मिन् । उग्राः । 8 (50)

**TS 3.3.4.2**

अचुच्यवुरित्याह यथायजुरेवैतत् ककुहꣳ रूपं वृषभस्य रोचते  
 बृहदित्याहैतद्-वा अस्य ककुहꣳ रूपं यद्-वृष्टी रूपेणैव वृष्टिमव  
 रुन्धे यत्ते सोमादाभ्यं नाम जागृवीत्याहैष ह वै हविषा हविर्यजति

यो ऽदाभ्यं गृहीत्वा सोमाय जुहोतिपरा वा एतस्याऽऽयुः

प्राण एति – [ ] 9

**TS 3.3.4.2 - Padam**

अचुच्यवुः । इति । आह । यथायजुरिति यथा-यजुः । एव । एतत् ।  
 ककुहम् । रूपम् । वृषभस्य । रोचते । बृहत् । इति । आह । एतत् ।  
 वै । अस्य । ककुहम् । रूपम् । यत् । वृष्टिः । रूपेण । एव ।  
 वृष्टिम् । अवेति । रुन्धे । यत् । ते । सोम । अदाभ्यम् । नाम ।  
 जागृवि । इति । आह । एषः । ह । वै । हविषा । हविः । यजति ।  
 यः । अदाभ्यम् । गृहीत्वा । सोमाय । जुहोति । परेति । वै ।  
 एतस्य । आयुः । प्राण इति प्र – अनः । एति । 9 (50)

**TS 3.3.4.3**

यो ऽंशुं गृह्णात्या नः प्राण एतु परावत इत्याहाऽऽयुरेव प्राणमात्मन्  
 धत्ते ऽमृतमसि प्राणाय त्वेति हिरण्यमभि व्यनित्यमृतं वै हिरण्यमायुः  
 प्राणोऽमृतेनैवाऽऽयुरात्मन् धत्ते शतमानं भवति शतायुः पुरुषः

श॒तेन्द्रि॒य॒ आ॒यु॒ष्ये॒वेन्द्रि॒ये॒ प्रति॑ तिष्ठ॒त्यप॑ उप॒ स्पृश॑ति भेष॒जं वा॑  
आपो॑ ( ) भेष॒जमे॒व कुरु॑ते ॥ 10

**TS 3.3.4.3 - Padam**

यः । अ॒शु॒म् । गृ॒ह्णा॒ति॑ । ए॒ति॑ । नः॒ । प्रा॒ण इति॑ प्र – अ॒नः॒ । ए॒तु॒ ।  
परा॒वत॑ इति॒ परा॑ – वतः॒ । इति॑ । आ॒ह॒ । आ॒युः॑ । ए॒व । प्रा॒णमि॑ति  
प्र – अ॒नम्॑ । आ॒त्मन् । ध॒त्ते॑ । अ॒मृत॑म् । अ॒सि॒ । प्रा॒णाये॑ति  
प्र – अ॒नाय॑ । त्वा॒ । इति॑ । हि॒रण्य॑म् । अ॒भि॒ । वी॑ति । अ॒नि॒ति॒ ।  
अ॒मृत॑म् । वै॒ । हि॒रण्य॑म् । आ॒युः॑ । प्रा॒ण इति॑ प्र – अ॒नः॒ । अ॒मृते॑न ।  
ए॒व । आ॒युः॑ । आ॒त्मन् । ध॒त्ते॑ । श॒तमा॑नमि॒ति श॒त – मा॒नम्॑ ।  
भव॑ति । श॒तायु॑रि॒ति श॒त – आ॒युः॑ । पु॒रुषः॑ । श॒तेन्द्रि॒य इति॑  
श॒त – इन्द्रि॒यः॑ । आ॒युषि॑ । ए॒व । इन्द्रि॒ये॑ । प्रती॑ति । तिष्ठ॒ति॒ ।  
अपः॑ । उपे॑ति । स्पृश॒ति॒ । भेष॑जम् । वै॒ । आपः॑ ( ) । भेष॑जम् ।  
ए॒व । कुरु॑ते ॥ 10 (53) (उ॒ग्रा – ए॒त्या – प – स्त्रीणि॑ च) (A4)

**TS 3.3.5.1**

वा॒युर॑सि प्रा॒णो नाम॑ स॒वितु॑राधि॒पत्ये ऽपानं॑ मे दा॒श्चक्षु॑रसि श्रोत्रं  
नाम॑ धा॒तुराधि॑पत्य॒ आयु॑र्मे दा॒ रूप॑मसि॒ वर्णो॑ नाम॒ बृह॑स्पते॒राधि॑पत्ये  
प्रा॒जां मे॑ दा॒ ऋ॒तम॑सि॒ सत्यं॑ नामेन्द्र॒स्याऽऽधि॑पत्ये॒ क्षत्रं॑ मे॒ दा  
भू॒तम॑सि॒ भव्यं॑ नाम॑ पि॒तृणा॑माधि॒पत्ये ऽपामो॑षधीनां॒ गर्भं॑ धा॒ ऋ॒तस्य॑  
त्वा व्यो॑मन॒ ऋ॒तस्य॑ – [ ] 11

**TS 3.3.5.1 - Padam**

वा॒युः । अ॒सि । प्रा॒ण इति॑ प्र – अ॒नः । नाम॑ । स॒वि॒तुः ।  
आधि॑पत्य॒ इत्याधि॑ – प॒त्ये । अ॒पान॑मित्यप – अ॒नम् । मे॒ । दाः ।  
चक्षुः॑ । अ॒सि । श्रो॒त्रम् ॥ नाम॑ । धा॒तुः । आधि॑पत्य॒ इत्याधि॑-प॒त्ये ।  
आयुः॑ । मे॒ । दाः । रू॒पम् । अ॒सि । वर्णः॑ । नाम॑ । बृह॑स्पतेः ॥  
आधि॑पत्य॒ इत्याधि॑ – प॒त्ये । प्रा॒जामि॑ति प्र-जा॒म् । मे॒ । दाः ।  
ऋ॒तम् । अ॒सि । स॒त्यम् । नाम॑ । इन्द्र॑स्य ।  
आधि॑पत्य॒ इत्याधि॑ – प॒त्ये । क्ष॒त्रम् । मे॒ । दाः । भू॒तम् । अ॒सि ।  
भव्यं॑ ॥ नाम॑ । पि॒तृणा॑म् । आधि॑पत्य॒ इत्याधि॑ – प॒त्ये । अ॒पाम् ।



ओष॑धीनाम् । गर्भ॑म् । धाः॑ । ऋ॒तस्य॑ । त्वा॑ ।

व्यो॑मन इति॒ वि – ओ॒मने॑ । ऋ॒तस्य॑ । 11 (50)

**TS 3.3.5.2**

त्वा॑ वि॒भूम॑न ऋ॒तस्य॑ त्वा॑ वि॒धर्म॑ण ऋ॒तस्य॑ त्वा॑ स॒त्याय॑र्तस्य॑ त्वा॑  
ज्यो॑तिषे॒ प्रजा॑पतिर् वि॒राज॑मपश्यत् तया॑ भू॒तं च॑ भ॒व्यं चा॑सृजत  
तामृ॑षिभ्यस्तिरो॑ ऽदधात् तां ज॒मद॑ग्निस्तपसा॑ ऽपश्यत् तया॑ वै स  
पृ॒श्नीन् कामा॑नसृजत॒ तत् पृ॒श्नीनां॑ पृ॒श्नित्वं॑ यत् पृ॒श्नयो॑ गृह्यन्ते  
पृ॒श्नीने॒व तैः कामा॑न् यज॒मानो॑ऽव रुन्धे वा॒युर॑सि प्रा॒णो – [ ] 12

**TS 3.3.5.2 - Padam**

त्वा॑ । वि॒भूम॑न इति॒ वि – भू॒मने॑ । ऋ॒तस्य॑ । त्वा॑ । वि॒धर्म॑ण इति  
वि – ध॒र्मणे॑ । ऋ॒तस्य॑ । त्वा॑ । स॒त्याय॑ । ऋ॒तस्य॑ । त्वा॑ । ज्यो॑तिषे ।  
प्रजा॑पतिरिति॒ प्रजा॑ – पतिः॑ । वि॒राज॑मिति॒ वि – राज॑म् । अ॒पश्य॑त् ।  
तया॑ । भू॒तम् । च॑ । भ॒व्यम् । च॑ । अ॒सृज॑त । ताम् । ऋ॑षिभ्य  
इत्यृ॑षि – भ्यः॑ । ति॒रः । अ॒दधा॑त् । ताम् । ज॒मद॑ग्निः । तप॑सा ।  
अ॒पश्य॑त् । तया॑ । वै । सः॑ । पृ॒श्नीन् । कामा॑न् । अ॒सृज॑त । तत् ।

पृ॒ञ्जी॑नाम् । पृ॒ञ्जि॑त्वमिति॑ पृ॒ञ्जि॑ – त्वम् । यत् । पृ॒ञ्जयः॑ ।  
 गृ॒ह्यन्ते॑ ॥ पृ॒ञ्जीन् । ए॒व । तैः । का॒मान् । यज॑मानः । अ॒वेति॑ । रु॒न्धे ।  
 वा॒युः । अ॒सि । प्रा॒ण इति॑ प्र – अ॒नः । 12 (50)

**TS 3.3.5.3**

ना॒मेत्या॑ह प्रा॒णापा॑नावे॒वाव रु॒न्धे चक्षु॑रसि॒ श्रोत्रं॑ ना॒मेत्या॑हाऽऽयु॑रे॒वाव  
 रु॒न्धे रू॒पम॑सि॒ वर्णो॑ ना॒मेत्या॑ह प्र॒जामे॑वाव रु॒न्धऋ॑तमसि॒ सत्यं॑  
 ना॒मेत्या॑ह क्ष॒त्रमे॑वाव रु॒न्धे भू॒तम॑सि॒ भव्यं॑ ना॒मेत्या॑ह प॒शवो॑ वा  
 अ॒पामो॑ष॒धीनां॑ गर्भः॒ पशू॑ने॒वा – [ ] 13

**TS 3.3.5.3 - Padam**

ना॒म । इति॑ । आ॒ह । प्रा॒णापा॑नाविति॑ प्रा॒ण-अ॒पानौ॑ । ए॒व । अ॒वेति॑ ।  
 रु॒न्धे । चक्षुः॑ । अ॒सि । श्रो॒त्रम् । ना॒म । इति॑ । आ॒ह । आ॒युः । ए॒व ।  
 अ॒वेति॑ । रु॒न्धे । रू॒पम् । अ॒सि । वर्णः॑ । ना॒म । इति॑ । आ॒ह ।  
 प्र॒जामि॑ति॒ प्र – जा॑म् । ए॒व । अ॒वेति॑ । रु॒न्धे । ऋ॒तम् । अ॒सि ।  
 स॒त्यम् । ना॒म । इति॑ । आ॒ह । क्ष॒त्रम् । ए॒व । अ॒वेति॑ । रु॒न्धे ।

भू॒तम् । अ॒सि॒ । भ॒व्यम् । ना॒म । इ॒ति । आ॒ह । प॒श॒वः । वै ।

अ॒पा॒म् । ओ॒ष॒धी॒ना॒म् । गर्भः॑ । प॒शून् । ए॒व । 13 (50)

**TS 3.3.5.4**

–व॑ रु॒न्ध ए॒ता॒वद्–वै॑ पु॒रु॒षं प॒रि॒त॒स्त॒दे॒वा॒व॑ रु॒न्ध ऋ॒त॒स्य॑ त्वा॒ व्यो॒म॒न॒  
इ॒त्या॒हे॒यं वा॑ ऋ॒त॒स्य॑ व्यो॒मे॒मा॒मे॒वा॒भि॑ ज॒य॒त्यृ॒त॒स्य॑ त्वा॒ वि॒भू॒म॒न॒  
इ॒त्या॒हा॒न्त॒रि॒क्षं वा॑ ऋ॒त॒स्य॑ वि॒भू॒मा॒न्त॒रि॒क्ष॒मे॒वा॒भि॑ ज॒य॒त्यृ॒त॒स्य॑ त्वा॒  
वि॒ध॒र्म॒ण॒ इ॒त्या॒ह॒ द्यौ॒र्वा॑ ऋ॒त॒स्य॑ वि॒ध॒र्म॒ दि॒व॒मे॒वा॒भि॑  
ज॒य॒त्यृ॒त॒स्य॑– [ ] 14

**TS 3.3.5.4 - Padam**

अ॒वे॒ति॑ । रु॒न्धे॑ । ए॒ता॒व॒त् । वै॑ । पु॒रु॒ष॒म् । प॒रि॒तः॑ । त॒त् । ए॒व ।

अ॒वे॒ति॑ । रु॒न्धे॑ । ऋ॒त॒स्य॑ । त्वा॒ । व्यो॒म॒न॒ इति॑ वि – ओ॒म॒ने॑ । इति॑ ।

आ॒ह॒ । इ॒य॒म् । वै॑ । ऋ॒त॒स्य॑ । व्यो॒मे॒ति॑ वि – ओ॒म॒ । इ॒मा॒म् । ए॒व ।

अ॒भी॒ति॑ । ज॒य॒ति॑ । ऋ॒त॒स्य॑ । त्वा॒ । वि॒भू॒म॒न॒ इति॑ वि–भू॒म॒ने॑ । इति॑ ।

आ॒ह॒ । अ॒न्त॒रि॒क्ष॒म् । वै॑ । ऋ॒त॒स्य॑ । वि॒भू॒मे॒ति॑ वि – भू॒म् ।

अ॒न्त॒रि॒क्ष॒म् । ए॒व । अ॒भी॒ति॑ । ज॒य॒ति॑ । ऋ॒त॒स्य॑ । त्वा॒ ।

वि॒ध॒र्म॒ण॒ इति॑ वि – ध॒र्म॒णे॑ । इति॑ । आ॒ह॒ । द्यौः॑ । वै । ऋ॒त॒स्य॑ ।  
 वि॒ध॒र्मे॒ति॑ वि – ध॒र्म॒ । दि॒वम्॑ ॥ ए॒व॒ । अ॒भी॒ति॑ । ज॒य॒ति॑ ।  
 ऋ॒त॒स्य॑ । 14 (50)

**TS 3.3.5.5**

त्वा॑ स॒त्याये॒त्याह॑ दि॒शो॒ वा ऋ॒त॒स्य॑ स॒त्यं दि॒श॑ ए॒वाभि॑ ज॒य॒त्यृ॒त॒स्य॑  
 त्वा॑ ज्यो॒तिष॑ इ॒त्याह॑ सु॒व॒र्गो॒ वै लो॒क॑ ऋ॒त॒स्य॑ ज्यो॒तिः॑ सु॒व॒र्ग॒मे॒व  
 लो॒क॒म॒भि॑ ज॒य॒त्ये॒ता॒व॒न्तो॒ वै दे॒व॒लो॒का॒स्ता॒ने॒वाभि॑ ज॒य॒ति॑ द॒श॒ सं  
 प॒द्य॒न्ते॒ द॒शा॒क्ष॒रा॒ वि॒रा॒ड॒न्नं॑ वि॒रा॒ड् वि॒रा॒ज्ये॒वा॒न्नाद्ये॑ प्र॒ति॑ ति॒ष्ठ॒ति॑ ॥ 15

**TS 3.3.5.5 - Padam**

त्वा॑ । स॒त्याय॑ । इति॑ । आ॒ह॒ । दि॒शः॑ । वै । ऋ॒त॒स्य॑ । स॒त्यम्॑ ।  
 दि॒शः॑ । ए॒व॒ । अ॒भी॒ति॑ । ज॒य॒ति॑ । ऋ॒त॒स्य॑ । त्वा॑ । ज्यो॒तिषे॑ । इति॑ ।  
 आ॒ह॒ । सु॒व॒र्ग॑ इति॑ सु॒वः॑ – गः । वै । लो॒कः॑ । ऋ॒त॒स्य॑ । ज्यो॒तिः॑ ।  
 सु॒व॒र्ग॒मि॒ति॑ सु॒वः॑ – गम् । ए॒व॒ । लो॒कम्॑ । अ॒भी॒ति॑ । ज॒य॒ति॑ ।  
 ए॒ता॒व॒न्तः॑ । वै । दे॒व॒लो॒का॒ इति॑ दे॒व – लो॒काः॑ । तान् । ए॒व॒ ।

अ॒भी॒ति॑ । ज॒य॒ति॑ । द॒श॑ । स॒मि॒ति॑ । प॒द्य॒न्ते॑ । द॒शाक्ष॑रेति॑  
द॒श॑ – अ॒क्ष॒रा॑ । वि॒राडि॑ति॒ वि – राट् । अ॒न्नम् । वि॒राडि॑ति॒  
वि – राट् । वि॒राजी॑ति॒ वि – राजि॑ । ए॒व । अ॒न्नाद्य॑ इत्य॒न्न – अद्यै॑ ।  
प्र॒ती॒ति॑ । ति॒ष्ठ॒ति॑ ॥ 15 (46)

(व्यो॑म॒न ऋ॒तस्य॑ – प्रा॒णः – प॒शू॒ने॒व – वि॒ध॒र्म दि॒व॒मे॒वाभि॑  
ज॒य॒त्यृ॒तस्य॑ – षट्च॑त्वारि॒ंशच्च) (A5)

**TS 3.3.6.1**

दे॒वा वै॑ यद्-य॒ज्ञे॒न॒ ना॒वा॒रु॒न्ध॒त॒ तत् परै॑र॒वा॒रु॒न्ध॒त॒ तत् परा॑णां  
पर॒त्वं यत् परे॑ गृह्य॒न्ते॒ यदे॒व य॒ज्ञे॒न॒ ना॒व॒रु॒न्धे॒ तस्या॑व॒रु॒द्ध्यै  
यं प्र॒थ॒मं गृ॒ह्णा॒ती॒ममे॒व ते॒न लो॒क॒म॒भि॒ ज॒य॒ति॒यं द्वि॒तीय॑म॒न्तरि॑क्षं  
ते॒न यं तृ॒तीय॑म॒मुमे॒व ते॒न लो॒क॒म॒भि॒ ज॒य॒ति॒ यदे॒ते गृ॒ह्य॒न्त ए॒षां  
लो॒का॒ना॒म॒भि॒जि॒त्या – [ ] 16

**TS 3.3.6.1 - Padam**

दे॒वाः । वै । यत् । य॒ज्ञे॒न॒ । न । अ॒वा॒रु॒न्ध॒ते॒त्य॒व – अ॒रु॒न्ध॒त॒ । तत् ।  
परैः॑ । अ॒वे॒ति॑ । अ॒रु॒न्ध॒त॒ । तत् । परा॑णाम् । पर॒त्वमि॑ति॒ पर – त्वम् ।

यत् । परे । गृह्यन्ते । यत् । एव । यज्ञेन । न । अवरुन्ध  
 इत्यव-रुन्धे । तस्य । अवरुद्ध्यु इत्यव -रुद्ध्यै । यम् । प्रथमम् ।  
 गृह्णाति । इमम् । एव । तेन । लोकम् । अभीति । जयति । यम् ।  
 द्वितीयम् । अन्तरिक्षम् । तेन । यम् । तृतीयम् । अमुम् । एव । तेन ।  
 लोकम् । अभीति । जयति । यत् । एते । गृह्यन्ते । एषाम् ।  
 लोकानाम् । अभिजित्या इत्यभि - जित्यै । 16 (50)

**TS 3.3.6.2**

उत्तरेष्वहस्स्वमुतो ऽर्वाञ्चो गृह्यन्ते ऽभिजित्यैवेमांँ लोकान् पुनरिमं  
 ँलोकं प्रत्यवरोहन्ति यत् पूर्वेष्वहस्स्वितः पराञ्चो गृह्यन्ते तस्मादितः  
 ँलोकं इमे लोका यदुत्तरेष्वहस्स्वमुतो ऽर्वाञ्चो गृह्यन्ते तस्मादमुतो  
 ँलोकं इमे लोकास्तस्मादयातयाम्नो लोकान् मनुष्या  
 उप जीवन्ति ब्रह्मवादिनो वदन्ति कस्मात् सत्याद्भ्य ओषधयः  
 सं भवन्त्योषधयो - [ ] 17

**TS 3.3.6.2 - Padam**

उ॒त्त॒रे॒ष्वि॒त्यु॒त् – त॒रेषु॑ । अ॒ह॒स्वि॒त्यहः॑ – सु॒ । अ॒मु॒तः॑ । अ॒र्वा॒ञ्चः॑ ।  
गृ॒ह्य॒न्ते॑ । अ॒भि॒जि॒त्ये॒त्यभि॑ – जि॒त्य॑ । ए॒व । इ॒मा॒न् । लो॒का॒न् । पु॒नः॑ ।  
इ॒म॒म् । लो॒क॒म् । प्र॒त्य॒व॒रो॒ह॒न्ती॑ति॒ प्रति॑ – अ॒व॒रो॒ह॒न्ति॑ । यत् । पू॒र्वेषु॑ ।  
अ॒ह॒स्वि॒त्यहः॑ – सु॒ । इ॒तः॑ । प॒रा॒ञ्चः॑ । गृ॒ह्य॒न्ते॑ । तस्मा॑त् । इ॒तः॑ ।  
प॒रा॒ञ्चः॑ । इ॒मे॑ । लो॒काः॑ । यत् । उ॒त्त॒रे॒ष्वि॒त्यु॒त् – त॒रेषु॑ ।  
अ॒ह॒स्वि॒त्यहः॑ – सु॒ । अ॒मु॒तः॑ । अ॒र्वा॒ञ्चः॑ । गृ॒ह्य॒न्ते॑ । तस्मा॑त् ।  
अ॒मु॒तः॑ । अ॒र्वा॒ञ्चः॑ । इ॒मे॑ । लो॒काः॑ । तस्मा॑त् । अ॒या॒त॒या॒म्न॑  
इ॒त्य॒या॒त॒या॒म्नः॑ । लो॒का॒न् । म॒नु॒ष्याः॑ । उ॒पे॒ति॑ । जी॒व॒न्ति॑ ।  
ब्र॒ह्म॒वा॒दि॒न॒ इति॑ ब्र॒ह्म – वा॒दि॒नः॑ । व॒द॒न्ति॑ । कस्मा॑त् । स॒त्यात्॑ ।  
अ॒द्भ्य॑ इ॒त्यत् – भ्यः॑ । ओ॒ष॒ध॒यः॑ । स॒मि॒ति॑ । भ॒व॒न्ति॑ ।  
ओ॒ष॒ध॒यः॑ । 17 (50)

**TS 3.3.6.3**

म॒नु॒ष्या॒णा॒म॒न्नं॑ प्र॒जा॒प॒तिं॑ प्र॒जा॒ अनु॑ प्र॒ जा॒य॒न्त॒ इति॑ प॒रा॒न॒न्वि॑ति  
ब्रू॒या॒द् – यद् – गृ॒ह्णा॒त्य॒द्भ्य॑स्त्वौ॒ष॒धी॒भ्यो॑ गृ॒ह्णा॒मी॒ति॑ तस्मा॑द्भ्य॑

ओष॑धयः॒ सं भव॑न्ति॒ यद्-गृ॑ह्णात्योष॑धीभ्यस्त्वा प्र॒जाभ्यो॑ गृ॒ह्णामीति॑  
तस्मा॑दोष॑धयो मनु॒ष्याणा॑मन्नं॒ यद्-गृ॑ह्णाति प्र॒जाभ्यस्त्वा  
प्र॒जाप॑तये गृ॒ह्णामीति॑ तस्मात् प्र॒जाप॑तिं प्र॒जा अनु॑ प्र जाय॑न्ते ॥ 18

**TS 3.3.6.3 - Padam**

मनु॒ष्याणा॑म् । अन्न॑म् । प्र॒जाप॑तिमिति॑ प्र॒जा - प॑तिम् । प्र॒जा इति॑  
प्र - जाः । अनु॑ । प्रेति॑ । जाय॑न्ते । इति॑ । परान् । अन्विति॑ । इति॑ ।  
ब्रूयात् । यत् । गृ॒ह्णाति॑ । अद्भ्य॑ इत्यत् - भ्यः । त्वा । ओष॑धीभ्य  
इत्योष॑धि - भ्यः । गृ॒ह्णामि॑ । इति॑ । तस्मात् । अद्भ्य॑ इत्यत्-भ्यः ।  
ओष॑धयः । समिति॑ । भव॑न्ति । यत् । गृ॒ह्णाति॑ । ओष॑धीभ्य  
इत्योष॑धि - भ्यः । त्वा । प्र॒जाभ्य॑ इति प्र - जाभ्यः । गृ॒ह्णामि॑ ।  
इति॑ । तस्मात् । ओष॑धयः । मनु॒ष्याणा॑म् । अन्न॑म् । यत् । गृ॒ह्णाति॑ ।  
प्र॒जाभ्य॑ इति प्र - जाभ्यः । त्वा । प्र॒जाप॑तये इति प्र॒जा - प॑तये ।  
गृ॒ह्णामि॑ । इति॑ । तस्मात् । प्र॒जाप॑तिमिति॑ प्र॒जा - प॑तिम् । प्र॒जा इति॑  
प्र - जाः । अनु॑ । प्रेति॑ । जाय॑न्ते ॥ 18 (48) (अभिजित्यै -

भव॑न्त्योष॑धयो - ऽष्टाच॑त्वारि॒ंशच्च॑) (A6)



**TS 3.3.7.1**

प्रजापतिर्देवासुरान् सृजत तदनु यज्ञोऽसृज्यत यज्ञं छन्दाँसि  
 ते विष्वञ्चो व्यक्रामन्थ् सोऽसुराननु यज्ञोऽपाक्रामद्-यज्ञं छन्दाँसि  
 ते देवा अमन्यन्ताऽमी वा इदमभूवन्. यद्-वयञ् स्म इति ते  
 प्रजापतिमुपाऽधावन्थ् सोऽब्रवीत्-प्रजापतिश्छन्दसां वीर्यमादाय  
 तद्वः प्र दास्यामीति स छन्दसां वीर्य - [ ] 19

**TS 3.3.7.1 - Padam**

प्रजापतिरिति प्रजा - पतिः । देवासुरानिति देव - असुरान् ।  
 असृजत । तत् । अन्विति । यज्ञः । असृज्यत । यज्ञम् । छन्दाँसि ।  
 ते । विष्वञ्चः । वीति । अक्रामन् । सः । असुरान् । अन्विति ।  
 यज्ञः । अपेति । अक्रामत् । यज्ञम् । छन्दाँसि । ते । देवाः ।  
 अमन्यन्त । अमी इति । वै । इदम् । अभूवन् । यत् । वयम् ।  
 स्मः । इति । ते । प्रजापतिमिति प्रजा-पतिम् । उपेति । अधावन् ।  
 सः । अब्रवीत् । प्रजापतिरिति प्रजा - पतिः । छन्दसाम् । वीर्यम् ।

आ॒दा॒ये॒त्या॑ – दा॒य॑ । तत् । वः । प्रेति॑ । दा॒स्या॒मि॑ । इति॑ । सः ।  
छन्दा॑साम् । वी॒र्य॑म् । 19 (50)

**TS 3.3.7.2**

मा॒दा॒य॑ तदे॒भ्यः॑ प्रा॒यच्छ॑त् तदनु॑ छन्दा॑स्यपा॒क्राम॑न् छन्दा॑सि  
य॒ज्ञस्ततो॑ दे॒वा अ॒भव॑न् परा॒सुरा॑ य ए॒वं छन्दा॑सां वी॒र्यं॑ वेदा॑स्य  
श्रा॒वया॑स्तु श्रौष॑ट् य॒ज ये य॒जाम॑हे वषट्कारो॑ भवत्या॒त्मना॑ परा॒स्य  
भ्रातृ॑व्यो भवति ब्रह्म॒वादि॑नो वदन्ति॒ कस्मै॑ क-म॒ध्वर्यु॑रा श्रावय॒तीति॑  
छन्दा॑सां वी॒र्या॑येति ब्रूयादे॒तद् वै – [ ] 20

**TS 3.3.7.2 - Padam**

आ॒दा॒ये॒त्या॑-दा॒य॑ । तत् । ए॒भ्यः॑ । प्रेति॑ । अ॒यच्छ॑त् । तत् । अ॒न्विति॑ ।  
छन्दा॑सि । अ॒पेति॑ । अ॒क्राम॑न् । छन्दा॑सि । य॒ज्ञः । ततः॑ । दे॒वाः ।  
अ॒भव॑न् । परेति॑ । अ॒सुराः॑ । यः । ए॒वम् । छन्दा॑साम् । वी॒र्य॑म् ।  
वेद॑ । एति॑ । श्रा॒वय॑ । अ॒स्तु । श्रौष॑ट् । य॒ज । ये । य॒जाम॑हे ।  
वषट्कार॑ इति॑ वषट् – कारः॑ । भवति॑ । आ॒त्मना॑ । परेति॑ । अ॒स्य॑ ।  
भ्रातृ॑व्यः । भवति॑ । ब्रह्म॒वादि॑न इति॑ ब्रह्म – वादि॑नः । वदन्ति॑ ।

क॒स्मै॑ । क॒म् । अ॒ध्व॒र्युः॑ । ए॒ति॑ । श्रा॒व॒य॒ति॑ । इ॒ति॑ । छ॒न्द॒साम् ।

वी॒र्या॑य । इ॒ति॑ । ब्रू॒यात् । ए॒तत् । वै । 20 (50)

**TS 3.3.7.3**

छ॒न्द॒सां॑ वी॒र्य॑मा श्रा॒व॒यास्तु॑ श्रौष॒ट् य॒ज॒ ये॒ य॒जाम॑हे वष॒ट्कारो॑  
य॒ ए॒वं वे॒द॒ स॒वी॒र्यै॑रे॒व छ॒न्दो॑भि॒रर्च॑ति॒ यत् किं॑ चा॒र्च॑ति॒ यदिन्द्रो॑  
वृ॒त्र-म॑ह॒न्नमे॒द्ध्यं॑ तद्-यद्-यती॑न॒पाव॑प॒दमे॒द्ध्यं॑ तदथ॒ कस्मा॑दैन्द्रो  
य॒ज्ञ आ स॑स्था॒तो-रि॒त्याहु॑-रिन्द्र॒स्य वा॑ ए॒षा य॒ज्ञिया॑ त॒नूर्य॑द्-  
य॒ज्ञस्ता॑मे॒व तद् ( ) य॑ज॒न्ति॒ य ए॒वं वे॒दोपै॑नं॒ यज्ञो॑ न॒मति॑ ॥ 21

**TS 3.3.7.3 - Padam**

छ॒न्द॒साम् । वी॒र्य॑म् । ए॒ति॑ । श्रा॒व॒य॒ । अस्तु॑ । श्रौष॒ट् । य॒ज॒ । ये ।

य॒जाम॑हे । वष॒ट्कार॑ इति॒ वष॒ट् - कारः॑ । यः । ए॒वम् । वे॒द ।

स॒वी॒र्यै॑रिति॒ स - वी॒र्यैः॑ । ए॒व । छ॒न्दो॑भि॒रिति॒ छन्दः॑ - भिः ।

अ॒र्च॑ति॒ । यत् । किम् । च॒ । अ॒र्च॑ति॒ । यत् । इन्द्रः॑ । वृ॒त्रम् । अ॒ह॒न् ।

अ॒मे॒द्ध्यम् । तत् । यत् । यती॑न् । अ॒पाव॑प॒दित्य॑प - अ॒व॒पत् ।

अ॒मे॒द्ध्यम् । तत् । अथ॑ । कस्मा॑त् । ऐन्द्रः॑ । य॒ज्ञः । ए॒ति॑ ।

स॒स्थातो॑रिति॒ सं – स्था॒तोः॑ । इति॑ । आ॒हुः॑ । इन्द्र॑स्य । वै । ए॒षा ।

य॒ज्ञिया॑ ॥ त॒नूः॑ । यत् । य॒ज्ञः॑ । ताम् । ए॒व । तत् ( ) । य॒जन्ति॑ ।

यः । ए॒वम् । वेद॑ । उपेति॑ । ए॒नम् । य॒ज्ञः॑ । न॒मति॑ ॥ 21 (58)

(छन्दसां वीर्यं – वा – एव त – दष्टौ च) (A7)

### TS 3.3.8.1

आ॒युर्दा॑ अ॒ग्ने ह॒विषो॑ जु॒षा॒णो घृ॒तप्र॑तीको॒ घृ॒तयो॑निरेधि ।

घृ॒तं पी॒त्वा मधु॑चा॒रु ग॒व्यं पि॒तेव॑पु॒त्रम॒भि र॒क्षता॑दि॒मं ॥

आ वृ॑श्च्यते॒ वा ए॒तद्-य॑ज॒मानो॑ऽग्नि॒भ्यां य॑दे॒नयोः॑

शृ॒तं कृ॒त्याथा॑न्यत्राव-भृ॒थ-म॒वैत्या॑युर्दा॒ अ॒ग्ने ह॒विषो॑ जु॒षा॒ण

इ॒त्यव॑भृ॒थम॒वैष्यन्॑ जु॒हुया॑दाहु॒त्यैवै॒नौ श॑मयति॒ नाऽऽर्ति॑मा॒र्च्छति॑

य॑ज॒मानो॑ यत् कु॒सीद॑ – [ ] 22

### TS 3.3.8.1 - Padam

आ॒युर्दा॑ इ॒त्यायुः॑ – दाः । अ॒ग्ने । ह॒विषः॑ । जु॒षा॒णः॑ । घृ॒तप्र॑तीक॒ इति॑

घृ॒त – प्र॒तीकः॑ । घृ॒तयो॑निरिति॒ घृ॒त-यो॒निः॑ । ए॒धि ॥ घृ॒तम् । पी॒त्वा ।

मधु॑ । चा॒रु । ग॒व्यम् ॥ पि॒ता । इ॒व । पु॒त्रम् । अ॒भीति॑ । र॒क्षता॑त् ।

इ॒मम् ॥ ए॒ति॑ । वृ॒श्च॒य॒ते॑ । वै । ए॒तत् । य॒ज॒मा॒नः॑ ।

अ॒ग्नि॒भ्या॒मि॒त्य॒ग्नि॑ – भ्या॒म् । यत् । ए॒न॒योः॑ । शृ॒तं॑ कृ॒त्ये॒ति॑

शृ॒तं – कृ॒त्य॑ । अथ॑ । अ॒न्य॒त्र॑ । अ॒व॒भृ॒थ॒मि॒त्य॒व॑ – भृ॒थ॒म् ।

अ॒वै॒ती॒त्य॒व॑ – ए॒ति॑ । आ॒यु॒र्दा॑ इ॒त्या॒युः॑ – दाः । अ॒ग्ने॑ । ह॒वि॒षः॑ ।

जु॒षा॒णः॑ । इ॒ति॑ । अ॒व॒भृ॒थ॒मि॒त्य॒व॑ – भृ॒थ॒म् । अ॒वै॒ष्य॒न्नि॒त्य॒व॑-ए॒ष्य॒न् ।

जु॒हु॒यात् । आ॒हु॒त्ये॒त्या॑ – हु॒त्या॑ । ए॒व । ए॒नौ॑ । श॒म॒य॒ति॑ । न ।

आ॒र्ति॑म् । ए॒ति॑ । ऋ॒च्छ॒ति॑ । य॒ज॒मा॒नः॑ । यत् । कु॒सी॒दम् । 22 (50)

### **TS 3.3.8.2**

म॒प्र॒ती॒त्तं॑ म॒यि॑ ये॒न॑ य॒म॒स्य॑ ब॒लि॒ना॑ च॒रा॒मि॑ ।

इ॒है॒व॑ स॒न् नि॒र॒व॒द॒ये॑ त॒दे॒तत्॑ त॒द॒ग्ने॑ अ॒नृ॒णो॑ भ॒वा॒मि॑ ।

वि॒श्व॒लो॒प॑ वि॒श्व॒दा॒व॒स्य॑ त्वा ऽऽस॒ञ्जु॑हो॒म्य॒ग्धा॑दे॒को ऽहु॒ता॑दे॒कः॑

स॒म॒स॒ना॑दे॒कः॑ ।

ते॒नः॑ कृ॒ण्व॑न्तु भेष॒ज॑ꣳ स॒दः॑ स॒हो॑ व॒रे॒ण्यं॑ ॥

अ॒यं नो॑ न॒भ॒सा॑ पु॒रः॑ सꣳस्फा॒नो॑ अ॒भि॑ र॒क्ष॒तु॑ ।

गृ॒हाणा॑-म॒स॒म॒र्त्यै॑ ब॒हवो॑ नो गृ॒हा असन् ॥

स त्वन्नो॑ - [ ] 23

**TS 3.3.8.2 - Padam**

अप्र॑ती॒त्त॒मित्य॑प्रति-इ॒त्तम् । म॒यि॑ । ये॒न॑ । य॒म॒स्य॑ । ब॒लिना॑ ॥ च॒रामि॑ ॥  
इ॒ह । ए॒व । सन् । नि॒र॒व॒द॒य इति॑ निः-अ॒व॒द॒ये । तत् । ए॒तत् । तत् ।  
अ॒ग्ने॑ । अ॒नृ॒णः॑ । भ॒वामि॑ ॥ वि॒श्व॒लो॒पेति॑ वि॒श्व - लो॒प ।  
वि॒श्व॒दा॒व॒स्येति॑ वि॒श्व - दा॒व॒स्य॑ । त्वा । आ॒सन् । जु॒होमि॑ ।  
अ॒ग्धा॒दि॒त्य॒ग्ध - अत् । ए॒कः॑ । अ॒हु॒ता॒दि॒त्य॒हुत - अत् । ए॒कः॑ ।  
स॒म॒स॒ना॒दि॒ति॑ स॒म॒सन - अत् । ए॒कः॑ ॥ ते । नः॑ । कृ॒ण्व॒न्तु ।  
भे॒ष॒ज॒म् । स॒दः॑ । स॒हः॑ । व॒रे॒ण्य॒म् ॥ अ॒य॒म् । नः॑ । न॒भ॒सा । पु॒रः॑ ।  
स॒स्फा॒न इति॑ सं - स्फा॒नः॑ । अ॒भी॒ति॑ । र॒क्ष॒तु ॥ गृ॒हाणा॑म् ।  
अ॒स॒म॒र्त्या॑ इत्य॒सं - ऋ॒त्यै॑ । ब॒हवः॑ । नः॑ । गृ॒हाः॑ । अ॒सन् ॥ सः॑ ।  
त्वम् । नः॑ । 23 (50)

**TS 3.3.8.3**

नभसस्पत ऊर्जं नो धेहि भद्रया ॥  
 पुनर्नो नष्टमा कृधि पुनर्नो रयिमा कृधि ॥  
 देव स॒स्फान सहस्रपोषस्येशिषे स नो रास्वाज्यानि॑ रायस्पोषं॑  
 सुवीर्यं॑ सँवथ्सरीणा॑ स्वस्तिं ॥  
 अग्निर्वाव यम इयं यमी कुसीदं वा एतद्-यमस्य यजमान आ दत्ते  
 यदोषधीभिर्वेदि॑ स्तृणाति यदनुपौष्य प्रयायाद् ग्रीवबद्धमेन -[ ] 24

**TS 3.3.8.3 - Padam**

नभसः । पते । ऊर्जम् । नः । धेहि । भद्रया ॥ पुनः । नः । नष्टम् ।  
 एति । कृधि । पुनः । नः । रयिम् । एति । कृधि ॥ देव ।  
 स॒स्फानेति सं - स्फान । सहस्रपोषस्येति सहस्र - पोषस्य ।  
 ईशिषे । सः । नः । रास्व । अज्यानिम् । रायः । पोषम् ।  
 सुवीर्यमिति सु - वीर्यम् । सँवथ्सरीणामिति सं - वथ्सरीणाम् ।  
 स्वस्तिम् ॥ अग्निः । वाव । यमः । इयम् । यमी । कुसीदम् । वै ।  
 एतत् । यमस्य । यजमानः । एति । दत्ते । यत् ।

ओषधीभिरित्योषधि – भिः । वेदिम् । स्तृणाति । यत् ।

अनुपौष्येत्यनुप – ओष्य । प्रयायादिति प्र – यायात् ।

ग्रीवबद्धमिति ग्रीव – बद्धम् । एनम् । 24 (50)

**TS 3.3.8.4**

ममुष्मिन् लोके नेनीयेरन् यत् कुसीदमप्रतीत्तं मयीत्युपौषतीहैव  
सन् यमं कुसीदं निरवदायानृणः सुवर्गं लोकमेतियदि मिश्रमिव  
चरेदञ्जलिना सक्तून् प्रदाव्ये जुहुयादेष वा अग्निर्वैश्वानरो यत्  
प्रदाव्यः स एवैनस्वदयत्यहं विधान्या-मेकाष्टकायामपूपं  
चतुश्शरावं पक्त्वा प्रातरेतेन कक्षमुपौषेद्यदि – [ ] 25

**TS 3.3.8.4 - Padam**

अमुष्मिन् । लोके । नेनीयेरन् । यत् । कुसीदम् ।

अप्रतीत्तमित्यप्रति – इत्तम् । मयि । इति । उपेति । ओषति । इह ।

एव । सन् । यमम् । कुसीदम् । निरवदायेति निः – अवदाय ।

अनृणः । सुवर्गमिति सुवः-गम् । लोकम् । एति । यदि । मिश्रम् ।

इव । चरेत् । अञ्जलिना । सक्तून् । प्रदाव्य इति प्र – दाव्ये ।



जुहु॒यात् । ए॒षः । वै । अ॒ग्निः । वै॒श्वान॒रः । यत् । प्र॒दा॒व्य इति॑  
 प्र - दा॒व्यः । सः । ए॒व । ए॒नम् । स्व॒द॒यति॑ । अ॒ह्नाम् ॥  
 वि॒धा॒न्या॒मिति॑ वि - धान्या॑म् । ऐ॒का॒ष्ट॒का॒या॒मित्ये॑क - अ॒ष्ट॒का॒या॑म् ॥  
 अ॒पूप॑म् । चतु॑श्शरा॒वमि॒ति चतुः॑ - शरा॒वम् । प॒क्त्वा । प्रा॒तः ।  
 ए॒तेन॑ । कक्ष॑म् । उ॒पेति॑ । ओ॒षेत् । यदि॑ । 25 (50)

**TS 3.3.8.5**

द॒हति॑ पु॒ण्य॒समं॑ भवति॒ यदि॑ न द॒हति॑ पा॒प॒सम॑मे॒तेन॑ ह॒ स्म वा ऋ॑षयः  
 पु॒रा वि॒ज्ञाने॑न दी॒र्घ॒स॒त्रमु॑प॒ यन्ति॒ यो वा उप॑द्र॒ष्टार॑-मु॒पश्रो॑तार॒-  
 म॒नु॒ख्या॒तारं॑ वि॒द्वान् । यज॑ते॒ सम॒मुष्मिन्॑ लो॒क इ॑ष्टा॒पूर्ते॑न  
 ग॒च्छते॑ ऽग्नि॒र्वा उप॑द्र॒ष्टा वा॒युरु॑प॒श्रोता॑ ऽऽदि॒त्योऽनु॑ख्या॒ता तान् । य  
 ए॒वं वि॒द्वान् । यज॑ते॒ सम॒मुष्मिन्॑ लो॒क इ॑ष्टा॒पूर्ते॑न ग॒च्छते॑ ऽयं  
 नो॒ नभ॑सा पु॒र - [ ] 26

**TS 3.3.8.5 - Padam**

द॒हति॑ । पु॒ण्य॒सम॑मि॒ति पु॒ण्य - सम॑म् । भवति॒ यदि॑ । न । द॒हति॑ ।  
 पा॒प॒सम॑मि॒ति पा॒प - सम॑म् । ए॒तेन॑ । ह॒ । स्म॒ । वै । ऋ॑षयः । पु॒रा ।

वि॒ज्ञाने॑नेति॒ वि – ज्ञाने॑न । दी॒र्घस॑त्रमि॒ति दी॒र्घ – स॒त्रम् । उपे॑ति ।  
यन्ति॑ । यः । वै । उप॒द्र॒ष्टार॑मित्युप – द्र॒ष्टार॑म् ।  
उप॒श्रो॒तार॑मित्युप – श्रो॒तार॑म् । अनु॒ख्या॒तार॑मित्यनु – ख्या॒तार॑म् ।  
वि॒द्वान् । यज॑ते । समि॒ति । अ॒मुष्मि॑न् । लो॒के ।  
इ॒ष्टापूर्ते॑नेती॒ष्ट – पूर्ते॑न । ग॒च्छ॒ते । अ॒ग्निः । वै । उप॒द्र॒ष्टेत्युप॑-द्र॒ष्टा ।  
वा॒युः । उप॒श्रो॒तेत्युप॑ – श्रो॒ता । आ॒दि॒त्यः । अनु॒ख्या॒तेत्यनु॑-ख्या॒ता ।  
तान् । यः । ए॒वम् । वि॒द्वान् । यज॑ते । समि॒ति । अ॒मुष्मि॑न् । लो॒के ।  
इ॒ष्टापूर्ते॑नेती॒ष्ट – पूर्ते॑न । ग॒च्छ॒ते । अ॒यम् । नः । नभ॑सा ।

पुरः । 26 (50)

**TS 3.3.8.6**

इ॒त्याहा॑ग्नि॒र्वै नभ॑सा पु॒रौऽग्नि॑मेव तदा॒है॒तन्मे॑ गोपा॒येति॑ स त्वं नो  
नभ॑सस्पत॒ इत्या॑ह वा॒युर्वै नभ॑सस्पति॒र्वायु॑मेव तदा॒है॒तन्मे॑ गोपा॒येति॑  
दे॒व स॒स्फाने॑त्याहा॒सौ वा आ॑दि॒त्यो दे॒वः स॒स्फान॑ आ॒दि॒त्यमे॒व  
तदा॒है॒तन्मे॑ गोपा॒येति॑ ॥ 27

**TS 3.3.8.6 - Padam**

इति॑ । आ॒ह । अ॒ग्निः॑ । वै । न॒भ॒सा । पु॒रः॑ । अ॒ग्नि॒म् । ए॒व । तत् ।  
 आ॒ह । ए॒तत् । मे॒ । गो॒पा॒य । इति॑ । सः । त्व॒म् । नः॑ । न॒भ॒सः॑ ।  
 प॒ते । इति॑ । आ॒ह । वा॒युः॑ । वै । न॒भ॒सः॑ । प॒तिः॑ । वा॒यु॒म् । ए॒व ।  
 तत् । आ॒ह । ए॒तत् । मे॒ । गो॒पा॒य । इति॑ । दे॒व । स॒॒स्फा॒नेति॑  
 सं – स्फा॒न । इति॑ । आ॒ह । अ॒सौ । वै । आ॒दि॒त्यः॑ । दे॒वः॑ ।  
 स॒॒स्फा॒न इति॑ सं – स्फा॒नः॑ । आ॒दि॒त्य॒म् । ए॒व । तत् । आ॒ह ।  
 ए॒तत् । मे॒ । गो॒पा॒य । इति॑ ( ) ॥ 27 (50)

(कु॒सी॒दं – त्वं॑ न॒ – ए॒न – मो॒षे॒द्यदि॑ – पु॒र – आ॒दि॒त्य॒मे॒व  
 तदा॑ है॒तन्मे॑ गो॒पा॒येति॑) (A8)

**TS 3.3.9.1**

ए॒तं॑ यु॒वा॒नं॑ परि॑ वो द॒दामि॑ ते॒न॒ क्री॒ड॒न्ती॑श्च॒रत॑ प्रि॒येण॑ ।  
 मा॒ नः॑ शा॒प्त॒ ज॒नु॒षा॑ सु॒भा॒गा रा॒य॒स्पो॒षेण॑ स॒मि॒षा॑ म॒देम॑ ॥  
 न॒मो॑ म॒हि॒म्न॒ उ॒त॑ च॒क्षु॒षे॑ ते॒ म॒रु॒तां॑ पि॒त॒स्त॒द॒हं॑ गृ॒णामि॑ ।  
 अ॒नु॑ म॒न्य॒स्व सु॒य॒जा॑ य॒जाम॑ जु॒ष्टं॑ दे॒वा॒ना॒मि॒द॒म॒स्तु॑ ह॒व्यं॑ ॥

दे॒वाना॑मे॒ष उप॑नाह आ॒सीद॑पां॒ गर्भ॑ ओष॒धीषु॑ न्यक्तः ।

सोम॑स्य द्र॒फ्सम॑वृणीत पू॒षा – [ ] 28

**TS 3.3.9.1 - Padam**

ए॒तम् । यु॒वान॑म् । परी॑ति । वः । द॒दामि॑ । तेन॑ । क्रीड॑न्तीः । च॒रत॑ ।  
 प्रि॒येण॑ ॥ मा । नः । शा॒प्त । ज॒नुषा॑ ॥ सु॒भागा॑ इति॑ सु – भा॒गाः ।  
 रा॒यः । पो॑षेण । समि॑ति । इ॒षा । म॒देम॑ ॥ नमः॑ । म॒हिम्ने॑ । उ॒त ।  
 चक्षु॑षे । ते । मरु॑ताम् । पि॒तः । तत् । अ॒हम् । गृ॒णामि॑ ॥ अ॒न्विति॑ ।  
 म॒न्यस्व॑ । सु॒यजे॑ति॒ सु-यजा॑ ॥ य॒जाम॑ । जु॒ष्टम् । दे॒वाना॑म् । इ॒दम् ।  
 अ॒स्तु । ह॒व्यम् ॥ दे॒वाना॑म् । ए॒षः । उ॒पना॑ह इत्यु॒प – ना॒हः ।  
 आ॒सीत् । अ॒पाम् । गर्भः॑ । ओष॒धीषु॑ । न्यक्त॑ इति॒ नि – अ॒क्तः ॥  
 सोम॑स्य । द्र॒फ्सम् । अ॒वृणी॑त । पू॒षा । 28 (50)

**TS 3.3.9.2**

बृ॒हन्न॑द्रि॒रभव॑त् त॒देषां॑ ॥

पि॒ता व॒थ्सानां॑ पति॑-र॒घ्नियाना॑-मथो॑ पि॒ता म॒हतां॑ गर्ग॑राणां ।

व॒थ्सो ज॒रायु॑ प्रति॒धुक् पी॒यूष॑ आ॒मिक्षा॑ म॒स्तु घृ॒तम॑स्य॒ रेतः॑ ॥

त्वां॑ गावो॑ऽवृणत॑ राज्याय॑ त्वा॑ ह॒वन्त॑ मरुतः॑ स्वर्काः॑ ।

वर्ष॑न् क्ष॒त्रस्य॑ क॒कुभि॑ शिश्रियाणस्ततो॑ न उ॒ग्रो वि॑ भ॒जा॑ वसूनि ॥

व्य॑द्धेन॒ वा ए॒ष प॒शुना॑ यज॒ते यस्यै॒तानि॑ न क्रि॒यन्त॑ ए॒ष ( )

ह॒ त्वै॑ समृद्धेन॒ यज॒ते यस्यै॒तानि॑ क्रि॒यन्ते॑ ॥ 29

**TS 3.3.9.2 - Padam**

बृ॒हन् । अ॒द्रिः । अ॒भ॒वत् । तत् । ए॒षाम् ॥ पि॒ता । व॒थ्साना॑म् ॥

पतिः॑ । अ॒घ्नियाना॑म् ॥ अथो॑ इति॑ । पि॒ता । म॒हता॑म् । गर्ग॑रणाम् ॥

व॒थ्सः । ज॒रायु॑ । प्र॒तिधु॑गिति॑ प्रति – धुक् । पी॒यूषः॑ । आ॒मिक्षा॑ ॥

मस्तु॑ । घृ॒तम् । अ॒स्य । रे॒तः ॥ त्वा॑म् । गा॒वः । अ॒वृण॑त । राज्याय॑ ।

त्वा॑म् । ह॒वन्त॑ । मरु॒तः । स्व॒र्का इति॑ सु – अ॒र्काः ॥ वर्ष॑न् ।

क्ष॒त्रस्य॑ । क॒कुभि॑ । शिश्रि॒याणः॑ । ततः॑ । नः । उ॒ग्रः । वी॒ति । भ॒ज ।

वसू॑नि ॥ व्य॑द्धेनेति॒ वि – ऋद्धे॑न । वै । ए॒षः । प॒शुना॑ । यज॒ते ।

यस्य॑ । ए॒तानि॑ । न । क्रि॒यन्ते॑ । ए॒षः ( ) । ह॒ । तु । वै । समृद्धे॑नेति॒

सं – ऋद्धे॑न । यज॒ते । यस्य॑ । ए॒तानि॑ । क्रि॒यन्ते॑ ॥ 29 (58)

(पू॒षा – क्रि॒यन्त॑ ए॒षा – ऽष्टौ॑ च) (A9)

**TS 3.3.10.1**

सूर्यो॑ दे॒वो दि॒विषद्भ्यो॑ धा॒ता क्ष॒त्राय॑ वा॒युः प्र॒जाभ्यः॑ ।

बृ॒हस्पति॑स्त्वा प्र॒जाप॑तये ज्योतिष्मतीं जुहोतु ॥

यस्या॑स्ते हरि॑तो गर्भोऽथो॑ योनिर्. हिरण्ययी॑ ।

अङ्गान्य॑हुता यस्यै॑ तां दे॒वैः सम॑जीगमं ॥

आ॑ वर्त॒न वर्त॑य नि॒ निव॑र्त॒न वर्त॑येन्द्र॒ नर्द॑बुद ।

भूम्या॑श्चतस्रः प्र॒दिश॑स्ताभिरा॒ वर्त॑या पुनः ॥

वि॑ ते भिनद्धि॑ त॒करीं॑ वि॒ योनिं॑ वि॒ गवी॑न्यौ ।

वि – [ ] 30

**TS 3.3.10.1 - Padam**

सूर्यः॑ । दे॒वः । दि॒विषद्भ्य॑ इति॑ दि॒विषत् – भ्यः॑ । धा॒ता । क्ष॒त्राय॑ ।

वा॒युः । प्र॒जाभ्य॑ इति॑ प्र – जाभ्यः॑ ॥ बृ॒हस्पतिः॑ । त्वा ।

प्र॒जाप॑तय इति॑ प्र॒जा-प॑तये । ज्योतिष्मतीम् । जुहोतु ॥ यस्याः॑ ।

ते । हरि॑तः । गर्भः॑ । अथो॑ इति॑ । योनिः॑ । हिरण्ययी॑ ॥ अङ्गानि॑ ।

अहु॑ता । यस्यै॑ । ताम् । दे॒वैः । समि॑ति । अ॒जीग॑मम् ॥ एति॑ ।

व॒र्त॒न॒ । व॒र्त॒य॒ । नी॒ति॒ । नि॒व॒र्त॒ने॒ति॒ नि॒ – व॒र्त॒न॒ । व॒र्त॒य॒ । इन्द्र॑ ।  
 न॒र्द॒बु॒द॒ ॥ भू॒म्याः॑ । च॒त॒स्रः॑ । प्र॒दि॒श॒ इति॑ प्र – दि॒शः॑ । ताभिः॑ ।  
 ए॒ति॑ । व॒र्त॒य॒ । पु॒नः॑ ॥ वी॒ति॑ । ते॒ । भि॒न॒द्भि॑ । त॒क॒री॒म् । वी॒ति॑ ।  
 यो॒नि॒म् । वी॒ति॑ । ग॒वी॒न्यौ॑ ॥ वी॒ति॑ । 30 (50)

**TS 3.3.10.2**

मा॒तरं॑ च पु॒त्रं च॒ वि गर्भं॑ च ज॒रायु॑ च ॥  
 ब॒हि॒स्ते॑ अ॒स्तु॒ बालि॑ति ॥  
 उ॒रु॒द्र॒फ॒सो॑ वि॒श्वरू॑प इन्द्रुः॑ प॒व॒मा॒नो॒ धी॒र॑ आ॒न॒ञ्ज॑ गर्भं॑ ॥  
 ए॒क॒प॒दी॑ द्वि॒प॒दी॑ त्रि॒प॒दी॑ च॒तु॒ष्प॒दी॑ पञ्च॒प॒दी॑ षट्प॒दी॑  
 स॒प्त॒प॒द्य॒ष्टा॒प॒दी॑ भु॒व॒ना॑ ऽनु प्रथ॒ता॑ स्वाहा॑ ॥  
 म॒ही॒ द्यौः॑ पृथि॒वी॑ च न इ॒मं य॑ज्ञं मि॒मि॒क्ष॒तां॑ ।  
 पि॒पृ॒ता॒न्नो॑ भ॒री॒म॒भिः॑ ॥ 31

**TS 3.3.10.2 - Padam**

मा॒तर॑म् । च॒ । पु॒त्र॑म् । च॒ । वी॒ति॑ । गर्भ॑म् । च॒ । ज॒रा॒यु॑ । च॒ ॥  
 ब॒हिः॑ । ते॒ । अ॒स्तु॑ । बाल् । इति॑ ॥ उ॒रु॒द्र॒फ॒स इत्यु॑रु – द्र॒फ॒सः॑ ।

पद पाठे (वाक्य सहित) – तृतीयकाण्डे – तृतीयः प्रश्नः

वि॒श्वरू॒प इति॑ वि॒श्व – रू॒पः । इ॒न्दुः । प॒व॒मा॒नः । धी॒रः । आ॒न॒ञ्ज ।  
ग॒र्भ॑म् ॥ ए॒क॒प॒दी॒त्ये॒क – प॒दी । द्वि॒प॒दी॒ति द्वि– प॒दी ॥ त्रि॒प॒दी॒ति  
त्रि – प॒दी ॥ च॒तु॒ष्प॒दी॒ति च॒तुः – प॒दी । प॒ञ्च॒प॒दी॒ति प॒ञ्च–प॒दी ।  
ष॒ट्प॒दी॒ति ष॒ट् – प॒दी । स॒प्त॒प॒दी॒ति स॒प्त – प॒दी ।  
अ॒ष्टा॒प॒दी॒त्य॒ष्टा–प॒दी । भु॒व॒ना । अ॒न्वि॒ति । प्र॒थ॒ता॒म् । स्वा॒हा ॥ म॒ही ।  
द्यौः । पृ॒थि॒वी । च । नः । इ॒म॒म् । य॒ज्ञ॒म् । मि॒मि॒क्ष॒ता॒म् ॥ पि॒पृ॒ता॒म् ।  
नः । भ॒री॒म॒भि॒रि॒ति भ॒री॒म – भिः ॥ 31 (44)

(ग॒वी॒न्यौ वि – च॒तु॒श्च॒त्वारि॒ञ्श॒च्च) (A10)

**TS 3.3.11.1**

इ॒दं वा॑–मा॒स्ये॑ ह॒विः प्रि॒यमि॑न्द्रा॒बृह॑स्पती ।  
उ॒क्थं॑ म॒दश्च॑ श॒स्य॑ते ॥  
अ॒यं वा॑ परि॒ षि॒च्य॑ते सो॒मइ॑न्द्रा॒बृह॑स्पती ।  
चा॒रु॒र्म॒दा॒य पी॑तये ॥  
अ॒स्मे इ॑न्द्रा॒बृह॑स्पती र॒यिं ध॑त्त॒ञ् श॒त॒ग्वि॑नं ।  
अ॒श्वा॒व॒न्त॒ञ् स॒हस्रि॑णं ॥



बृहस्पतिर्नः॑ परि॑ पातु॑ पश्चा-दुतोत्तरस्मा-दधरा-दघायोः॑ ।

इन्द्रः॑ पुरस्तादु॑त मद्ध्यतो॑ नः॒ सखा॑ सखिभ्यो॑ वरिवः॑ कृणोतु ॥

वि ते॑ विष्वग्वातजूतासो॑ अग्ने॑ भामासः - [ ] 32

**TS 3.3.11.1 - Padam**

इ॒दम् । वा॒म् । आ॒स्ये॑ । ह॒विः । प्रि॒यम् । इ॒न्द्रा॒बृ॒ह॒स्प॒ती

इ॒ती॒न्द्रा-बृ॒ह॒स्प॒ती ॥ उ॒क्थ॑म् । म॒दः । च । श॒स्य॑ते ॥ अ॒यम् ।

वा॒म् । प॒री॒ति । सि॒च्य॑ते । सोमः॑ । इ॒न्द्रा॒बृ॒ह॒स्प॒ती इ॒ती॒न्द्रा-बृ॒ह॒स्प॒ती ॥

चा॒रुः । म॒दा॒य । पी॒तये॑ ॥ अ॒स्मे इ॒ति ।

इ॒न्द्रा॒बृ॒ह॒स्प॒ती इ॒ती॒न्द्रा - बृ॒ह॒स्प॒ती । र॒यि॑म् । ध॒त्त॑म् । श॒त॒ग्वि॒न॒मि॒ति

श॒त - ग्वि॒न॑म् ॥ अ॒श्वा॒व॒न्त॒मि॒त्यश्च॑ - व॒न्त॑म् । स॒ह॒स्रि॒ण॑म् ॥

बृ॒ह॒स्प॒तिः । नः॑ । प॒री॒ति । पा॒तु । प॒श्चा॒त् । उ॒त ।

उ॒त्त॒र॒स्मा॒दि॒त्यु॒त् - त॒र॒स्मा॒त् । अ॒ध॒रा॒त् । अ॒घा॒यो॒रि॒त्यघ॑ - योः ॥

इ॒न्द्रः । पुरस्ता॑त् । उ॒त । म॒द्ध्य॑तः । नः॑ । सखा॑ । सखि॑भ्य इति॑

सखि॑ - भ्यः । वरि॑वः । कृ॒णो॒तु ॥ वी॒ति । ते । वि॒ष्वक् ।

वा॒तजू॑तास इति॑ वा॒त - जू॒ता॒सः । अ॒ग्ने । भामा॑सः । 32 (50)

**TS 3.3.11.2**

शु॒चे शु॒चय॑श्चरन्ति ।

तु॒वि॒म्र॒क्षासो॑ दि॒व्या न॑व॒ग्वा वना॑ वनन्ति धृ॒षता॑ रु॒जन्तः॑ ॥

त्वा॒मग्ने॑ मा॒नुषी॑रीडते॒ विशो॑ हो॒त्रावि॒दं वि॒विचि॑ र॒त्नधा॑त॒मं ।

गुहा॑ सन्तं सु॒भग॑ वि॒श्वदर्श॑तं तु वि॒ष्मण॑सु सु॒यजं॑ घृ॒तश्रियं॑ ॥

धा॒ता द॑दातु नो र॒यिमी॑शा॒नो जग॑त॒स्पतिः॑ ।

स नः॑ पू॒र्णेन॑ वा॒वनत् ॥

धा॒ता प्र॒जाया॑ उ॒त रा॒य ई॒शे धा॒तेदं॑ वि॒श्वं भु॑वनं॒ जजान॑ ।

धा॒ता पु॒त्रं य॑ज॒मानाय॑ दा॒ता – [ ] 33

**TS 3.3.11.2 - Padam**

शु॒चे । शु॒चयः॑ । च॒रन्ति॑ ॥ तु॒वि॒म्र॒क्षास॑ इति तु॒वि – म्र॒क्षासः॑ ।

दि॒व्याः । न॑व॒ग्वाः । वना॑ । व॒नन्ति॑ । धृ॒षता॑ । रु॒जन्तः॑ ॥ त्वा॒म् ।

अ॒ग्ने । मा॒नुषीः॑ । ई॒डते॑ । वि॒शः । हो॒त्रावि॒दमि॑ति हो॒त्रा – वि॒दम् ।

वि॒विचि॑मि॒ति वि॒-वि॒चिम् । र॒त्नधा॑त॒ममि॑ति र॒त्न – धा॑त॒मम् ॥ गुहा॑ ॥

सन्त॑म् । सु॒भगे॑ति सु – भ॒ग । वि॒श्वदर्श॑तमि॒ति वि॒श्व-दर्श॑तम् ।

तु॒वि॒ष्म॒ण॒स॒म् ॥ सु॒य॒ज॒मि॒ति॒ सु॒ – य॒ज॒म् ॥

घृ॒त॒श्रि॒य॒मि॒ति॒ घृ॒त॒ – श्रि॒य॒म् ॥ धा॒ता॒ । द॒दा॒तु॒ । नः॒ । र॒यि॒म् ।

ई॒शा॒नः॑ । ज॒ग॒तः॑ । प॒तिः॑ ॥ सः॒ । नः॒ । पू॒र्णे॑न॒ । वा॒व॒न॒त् ॥ धा॒ता॒ ।

प्र॒जा॒या॒ इ॒ति॑ प्र – जा॒याः॑ । उ॒त॒ । रा॒यः॑ । ई॒शे॑ । धा॒ता॒ । इ॒द॒म् ।

वि॒श्व॒म् । भु॒व॒न॒म् । ज॒जा॒न ॥ धा॒ता॒ । पु॒त्र॒म् । य॒ज॒मा॒ना॒य॒ ।

दा॒ता॒ ॥ 33 (50)

**TS 3.3.11.3**

त॒स्मा॑ उ॒ ह॒व्यं॑ घृ॒त॒व॒द्वि॒धे॒म ॥

धा॒ता॒ द॒दा॒तु॒ नो॒ र॒यिं॑ प्रा॒चीं॑ जी॒वा॒तु॒म॒क्षि॒तां॑ ।

व॒यं॑ दे॒व॒स्य॑ धी॒म॒हि॒ सु॒म॒ति॑ꣳ स॒त्य॒रा॒ध॒सः॑ ॥

धा॒ता॒ द॒दा॒तु॒ दा॒शु॒षे॒ व॒सू॒नि॑ प्र॒जा॒का॒मा॒य॒ मी॒ढु॒षे॑ दुरो॒णे॑ ।

त॒स्मै॑ दे॒वा॒ अ॒मृ॒ताः॒ सं॑ व्य॒य॒न्तां॑ वि॒श्वे॑ दे॒वा॒सो॒ अ॒दि॒तिः॑ स॒जो॒षाः॑ ॥

अ॒नु॒ नो॒ ऽघ्ना॑ ऽनु॒म॒ति॒र्य॒ज्ञं॑ दे॒वेषु॑ म॒न्य॒तां॑ ।

अ॒ग्नि॒श्च॑ ह॒व्य॒वा॒ह॒नो॒ भव॑तां दा॒शु॒षे॒ म॒यः॑ ॥

अ॒न्वि॒द॒नु॒म॒ते॒ त्वं॑ – [ ] 34

**TS 3.3.11.3 - Padam**

तस्मै॑ । उ॒ । ह॒व्यम् । घृ॒तव॑दिति॑ घृ॒त-व॑त् । वि॒धेम॑ ॥ धा॒ता । द॒दातु॑ ।  
नः॑ । र॒यिम् । प्रा॒चीम् । जी॒वातु॑म् । अ॒क्षिता॑म् ॥ व॒यम् । दे॒वस्य॑ ।  
धी॒महि॑ । सु॒मति॑मिति॑ सु - म॒तिम् । स॒त्यरा॑धस इति॑  
स॒त्य - रा॑धसः ॥ धा॒ता । द॒दातु॑ । दा॒शुषे॑ ॥ व॒सूनि॑ । प्र॒जाका॑मायेति॑  
प्र॒जा - का॑माय । मी॒ढुषे॑ ॥ दु॒रोण॑ इति॑ दुः-ओ॒ने ॥ तस्मै॑ । दे॒वाः ।  
अ॒मृताः॑ । स॒मिति॑ । व्य॒यन्ता॑म् । वि॒श्वे॑ ॥ दे॒वासः॑ । अ॒दितिः॑ ।  
स॒जोषा॑ इति॑ स - जो॒षाः ॥ अ॒न्विति॑ । नः॑ । अ॒द्य ।  
अ॒नुम॑तिरित्यनु॑ - म॒तिः । य॒ज्ञम् । दे॒वेषु॑ । म॒न्यता॑म् ॥ अ॒ग्निः । च॒ ।  
ह॒व्यवा॑हन इति॑ ह॒व्य - वा॑हनः । भ॒वता॑म् । दा॒शुषे॑ ॥ म॒यः ॥  
अ॒न्विति॑ । इत् । अ॒नुम॑त इत्यनु॑ - म॒ते । त्वम् । 34 (50)

**TS 3.3.11.4**

म॒न्यासै॑ शञ्चनः कृ॒धि ।  
क्र॒त्वे द॑क्षाय नो हि॒नु प्र॒ ण॒ आयू॑षि तारिषः ॥  
अ॒नु म॑न्यता-म॒नुम॑न्यमाना प्र॒जाव॑न्तं र॒यिम॑क्षीयमाणं ।

तस्यै॑ व॒यꣳ हे॑ड॒सि॒ मा ऽपि॑ भू॒म सा नो॑ दे॒वी सु॒हवा॑ शर्म॑ यच्छतु ॥

यस्या॑मिदं प्रदिशि॑ यद्विरोचते॑ऽनुमतिं॑ प्रति॑ भूषन्त्यायवः॑ ।

यस्या॑ उपस्थ॑ उर्वन्तरिक्षꣳ सा नो॑ दे॒वी सु॒हवा॑ शर्म॑ यच्छतु ॥ 35

**TS 3.3.11.4 - Padam**

मन्या॑सै । शम् । च । नः । कृ॒धि ॥ क्र॒त्वै॑ । दक्षाय॑ । नः । हि॒नु ।

प्रेति॑ । नः । आयूꣳषि॑ । तारिषः॑ ॥ अन्विति॑ । मन्यताम् ।

अनु॑मन्यमानेत्यनु॑ – मन्यमाना । प्रजा॑वन्तमिति॑ प्रजा – वन्तम् ।

रयिम् । अक्षी॑यमाणम् ॥ तस्यै॑ । व॒यम् । हे॑ड॒सि । मा । अपीति॑ ।

भू॒म । सा । नः । दे॒वी । सु॒हवेति॑ सु – हवा॑ । शर्म॑ । यच्छतु ॥

यस्या॑म् । इ॒दम् । प्र॒दिशीति॑ प्र – दिशि॑ । यत् ।

विरो॑चत इति॑ वि – रोचते । अनु॑मतिमित्यनु॑ – मतिम् । प्रतीति॑ ।

भू॒षन्ति॑ । आ॒यवः॑ ॥ यस्याः॑ । उप॒स्थ इत्युप॑ – स्थः । उ॒रु ।

अन्त॑रिक्षम् । सा । नः । दे॒वी । सु॒हवेति॑ सु – हवा॑ । शर्म॑ ।

यच्छतु ॥ 35 (50)

**TS 3.3.11.5**

रा॒काम॒ह॒ सु॒हवा॒ सु॒ष्टु॒ती हु॒वे शृ॒णोतु॑ नः सु॒भगा॒ बो॒धतु॑ त्मना॑ ॥  
 सी॒व्यत्व॑पः सू॒च्याऽच्छि॑द्यमानया ददातु वी॒र॒ श॒तदा॑यमु॒क्थ्यं ॥  
 यास्ते॑ राके सु॒मतयः॑ सु॒पेश॑सो याभि॒र्ददा॑सि दा॒शुषे॑ वसू॒नि ।  
 ताभि॑र्नो अ॒द्य सु॒मना॑ उ॒पाग॑हि सहस्रपोष॑ सु॒भगे॑ रराणा ॥  
 सिनी॑वालि या सु॒पाणिः ॥

कु॒हू॒म॒ह॒ सु॒भगां॑ वि॒द्वना॑पसमस्मिन् य॒ज्ञे सु॒हवां॑ जो॒हवी॑मि ।  
 सा नो॑ ददातु श्रवणं ( ) पि॒तृणां॑ तस्यास्ते देवि ह॒विषा॑ वि॒धेम ॥  
 कु॒हूर् दे॒वाना॑ममृतस्य पत्नी ह॒व्या नो॑ अस्य ह॒विष॑श्चिकेतु ।  
 सं दा॒शुषे॑ कि॒रतु॑ भूरि॒ वाम॑ रा॒यस्पोषं॑ चि॒कितु॑षे दधातु ॥ 36

**TS 3.3.11.5 - Padam**

रा॒काम् । अ॒हम् । सु॒हवा॒मिति॑ सु – ह॒वाम् । सु॒ष्टु॒तीति॑ सु-स्तु॒ती ।  
 हु॒वे । शृ॒णोतु॑ । नः । सु॒भगे॑ति॑ सु – भगा॑ । बो॒धतु॑ । त्मना॑ ॥  
 सी॒व्यतु॑ । अपः । सू॒च्या । अ॒च्छि॑द्यमानया । ददातु । वी॒रम् ।  
 श॒तदा॑यमिति॑ श॒त – दा॒यम् । उ॒क्थ्यम् ॥ याः । ते । रा॒के ।

सु॒म॒त॒य॒ इति॑ सु॒ – म॒त॒यः॑ । सु॒पे॒श॒स॒ इति॑ सु॒ – पे॒श॒सः॑ । या॒भिः॑ ।  
 ददा॑सि । दा॒शु॒षे॑ ॥ व॒सू॒नि ॥ ता॒भिः॑ । नः॑ । अ॒द्य ।  
 सु॒म॒ना॒ इति॑ सु॒ – म॒नाः॑ ॥ उ॒पा॒ग॒ही॒त्यु॒प – आ॒ग॒हि॑ । स॒ह॒स्र॒पो॒ष॒मि॒ति॑  
 स॒ह॒स्र – पो॒ष॒म् । सु॒भ॒ग॒ इति॑ सु॒ – भ॒गे॑ । र॒रा॒णा ॥ सि॒नी॒वा॒लि॑ ।  
 या । सु॒पा॒णि॒रि॒ति॑ सु॒ – पा॒णिः॑ ॥ कु॒हू॒म् । अ॒ह॒म् । सु॒भ॒गा॒मि॒ति॑  
 सु॒ – भ॒गा॒म् । वि॒द्व॒ना॒प॒स॒मि॒ति॑ वि॒द्व॒न – अ॒प॒स॒म् । अ॒स्मि॒न् ।  
 य॒ज्ञे । सु॒ह॒वा॒मि॒ति॑ सु॒ – ह॒वा॒म् । जो॒ह॒वी॒मि ॥ सा॑ । नः॑ । द॒दा॒तु॑ ।  
 श्र॒व॒ण॒म् ( ) । पि॒तृ॒णा॒म् । त॒स्याः॑ । ते॒ । दे॒वि॒ । ह॒वि॒षा॑ । वि॒धे॒म ॥  
 कु॒हूः॑ । दे॒वा॒ना॒म् । अ॒मृ॒त॒स्य॑ । प॒त्नी॑ । ह॒व्या॑ । नः॑ । अ॒स्य॑ । ह॒वि॒षः॑ ।  
 चि॒के॒तु॑ ॥ स॒मि॒ति॑ । दा॒शु॒षे॑ । कि॒र॒तु॑ । भू॒रि॑ । वा॒म॒म् । रा॒यः॑ । पो॒ष॒म् ।  
 चि॒कि॒तु॒षे॑ । द॒धा॒तु॑ ॥ 36 (74)

(भा॒मा॒सो॑ – दा॒ता – त्व – म॒न्त॒रि॒क्ष॒सा॑ नो॒ दे॒वी॑ सु॒ह॒वा॒ शर्म॑  
 य॒च्छ॒तु॑ – श्र॒व॒णं॑ – च॒तुर्वि॒शति॑श्च) (A11)

पद पाठे (वाक्य सहित) – तृतीयकाण्डे – तृतीयः प्रश्नः

**Prasna Korvai with starting Padams of 1 to 11 Anuvaakams :-**

(अग्ने॑ तेजस्विन् – वा॒युर् – वस॑व – स्त्वै॒तद्वा अ॒पां – वा॒युर्सि॑  
प्रा॒णो नाम॑ – दे॒वा वै यद्य॒ज्ञेन॑ न – प्र॒जाप॑तिर् दे॒वासु॒रा – ना॒युर्दा॑  
– ए॒तं यु॑वा॒न् – सूर्यो॑ दे॒व – इ॒दं वा॑ – मे॒काद॑श)

**Korvai with starting Padams of 1, 11, 21 Series of Panchaatis :-**

(अग्ने॑ तेजस्विन् – वा॒युर्सि॑ – छ॒न्दसां॑ वी॒र्यं॑ – मा॒तरञ्च॑ –  
षट्त्रिं॑शत् )

**First and Last Padam of Third Prasnam of Kandam 3 :-**

(अग्ने॑ तेजस्वि॒ – श्रि॒कितु॑षे दधातु )

॥ हरिः॑ ओं ॥

॥ कृष्ण यजुर्वेदीय तैत्तिरीय संहितायां पद पाठे

तृतीयकाण्डे तृतीयः प्रश्नः समाप्तः ॥



पद पाठे (वाक्य सहित) – तृतीयकाण्डे – तृतीयः प्रश्नः

**Summary breakup of Padam - in Kaandam 3, Prasnam 3**

Particulars		Example ( in Pada PaaTam)	No. of Padams as per Pada PaaTam
सामान्य पदानि	Ord	इषे । त्वा । ऊर्जे ।	1503
उपसर्ग पदानि	PRE	एति = (आ+इति) । उपेति = (उप+इति) । प्रेति = (प्र+इति) ।	108
वेष्टन पदानि	PS	उपायवः = उपायव इत्युप - आयवः । बाहुभ्याम् = बाहुभ्यामिति बाहु - भ्याम्) ।	238
प्रग्रह पदानि	PG	ते = (ते इति) । त्वे = (त्वे इति) । चक्षुषी = (चक्षुषी इति) । विष्णो = विष्णो इति ।	4
प्रग्रह वेष्टन पदानि	PGS	अधिषवणे = अधिषवणे इत्यधि - सवने । इन्द्राग्री = इन्द्राग्री इतीन्द्र - अग्री	4
		<b>Total Padams</b>	<b>1857</b>

पद पाठे (वाक्य सहित) – तृतीयकाण्डे – तृतीयः प्रश्नः

Details of Panchati and Padam for Kandam 3 , Prasanam 3 – (TS 3.3)

	Panchati	Padams
Anuvakam 1	2	123
Anuvakam 2	2	78
Anuvakam 3	3	175
Anuvakam 4	3	153
Anuvakam 5	5	246
Anuvakam 6	3	148
Anuvakam 7	3	158
Anuvakam 8	6	300
Anuvakam 9	2	108
Anuvakam 10	2	94
Anuvakam 11	5	274
Total →	36	1857

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site [www.vedavms.in](http://www.vedavms.in)